


LA QUOTIDIANA

FMR Fundaziun Medias Rumantschas, Via da Masans 2, 7000 Cuira, 081 544 89 11, redacziun@fmr.ch



**Sis novas personalitads
«a Trun sut igl ischi»**
*Sis personalitads adempleschan ils treis
criteris per vegnir onuradas 2024 en il
Curtin d'onur a Trun.***Pagina 6**



**La rampa da peschs dal
Glogn – secunda runda**
*Ils peschs duaian pudair viandar dal
Glogn e Rain da Val siador. Questa fi-
namira ha in project nov.***Pagina 6**

FMR FUNDAZIUN
MEDIAS
RUMANTSCHAS

 **südostschweiz**

SURSELVA

In local per giuvens e restai giuvens

Avon 19 onns ei la Bar Postigliun amiez il vitg da Mustér vegni-
da serrada. Ussa vegn ella puspei aviarta. Menada vegn ella dil
possessur dallas localitads, *Pirmin Monn*: «Jeu hai udiu e ligiu il
clom ed il selamentem dalla giuventetgna ch'ei maunchi loghens
da sescuntrar, respectiv localitads da sortida.» Naven dils 23 da
december 2023 porscha el quella caschun mintgamai il vender-
dis e la sonda sera. Buca mo ils giuvenils duein saver guder sia
purschida, mobein era persunas empau pli veglias. «Ei dat era
glieud carschida – seigi indigens sco hosps da vacanzas – che
tscherchan ina caschun da sortida», ha Pirmin Monn detg alla
FMR. (fmr/hh)

Pagina 7

ENGIADINA

Fer ün plaschair cun regalins e chaunt



Üna scolara chi tegna il maun d'üna attempeda düraunt la visita da
la scoula da la Plaiv.

FOTO MARTIN CAMICHEL

Fin avaunt la pandemia ho la scoula da la Plaiv – il s-chelin ot
da las vschinaunchas da La Punt Chamues-ch, Madulain, Zuoz
e S-chanf – adüna organiso üna produczüin d'advent publica.
Ma daspö il prüm an da la pandemia fo la scoula ün proget soci-
ciel aunz Nadel. Ils scolars d'eiran già a visiter attempos a che-
sa e quist an sun tuot ils 42 scolars e scolaras ieus a Samedan in
l'asil d'attempos Promulins. Per lur visita in mardi passo haun
ils scolars preparo diversas rapreschantaziuns, chanzuns, ün
sketsch scu eir regalins fats a maun. Cun scumpartir ils regalins
e las cartas haun ils scolars eir gieu la lezcha da piglier sü con-
tact culs abitants e zieva pochass frassas ho que do dapertuot ba-
derledas. A la fin nu d'eira la visita da la scoula be üna surprai-
sa pels attempos, dimpersè eir ils scolars paraivan cuntaints
d'avair fat ün plaschair d'advent als abitants e las abitantas da
Promulins. (fmr/cam)

Pagina 9

GRISCHUN CENTRAL

Nicole Sigron surpeglia igl timung

Igl mandat dalla presidenta u digl president digl parlamaint com-
munal da Vaz è limito sen en onn. Percheigl ò chel gremi legisla-
tiv gia d'eliger marde ainten sia davosa seduta da chest onn ena
successoura u en successour per *Tanja Cola-Ritschatsch*. Cun es-
ser stada igls davos 12 meis vicepresidenta digl cunsegl commu-
nal è *Nicole Sigron* neida eligeida sainza cuntervorsch. La donna
da 49 onns tg'è siva digl schaner 2022 aint igl cunsegl commu-
nal less s'angascher per cultura, agricultura, pero er per la gene-
ralitad. (fmr/gns/sab)

Pagina 11

Il matg flurs va giu dal Rain

Il chantun Grischun sto spetgar vinavant sin in tschintgavel cusseglier federal. Tar las elecziuns da la mesemna ha il favurit
Beat Jans da Basilea-Citad fatg la cursa cunter il Grischun Jon Pult ed il candidat «selvadi» da Turitg, Daniel Jositsch.

SDA/FMR

Ina gronda surpraisa n'hai betg dà mesemna a Berna en Chasa federala.
Beat Jans è vegnì elegì da l'Assamblea federala en il terz scrutinì, cun 134
da 245 vuschs valaivlas. Il socialdemocrat da Basilea-Citad è sa mess tras
cunter *Daniel Jositsch* (68 vuschs) e *Jon Pult* (43 vuschs) – ed el daven-
ta uschia successur dal cusseglier federal partent *Alain Berset*. Al segund
candidat uffizial da la PS, cusseglier naziunal grischun Jon Pult, n'èsi en
tut ils trais scrutinis betg gartegià da recaltgar avunda vuschs per met-
ter en privel l'elecziun da Beat Jans.

Jositsch procura per chaus cotschens

Tar ils socialdemocrats han las bleras vuschs ch'il candidat selvadi Da-
niel Jositsch ha recaltgà procurà per chaus cotschens. I saja ina cumplet-

ta mancanza da respect envers ils candidats uffizials che la partida ha no-
minà per l'elecziun, ha ditg la cussegliera naziunala da Friburg *Valérie
Piller-Carnard*.

Basilea-Citad suenter 50 onns

Beat Jans è l'emprim cusseglier federal dapi passa 50 onns che repre-
scenta il chantun Basilea-Citad. L'on 1959 era vegnì elegì, cun Hans-
Peter Tschudi, la davosa giada in politicher da Basilea-Citad en la regen-
za naziunala. En ses pled suenter l'elecziun ha Beat Jans intunà l'impur-
tanza da cumpromiss per dumagnar las sfidas actualas e l'abiltad da trair
a niz la forza da la diversitad.

Ils ulteriurs sis cussegliers/as federals/as ch'eran enfin ussa en uffizi
èn vegnids reelegids mesemna senza problems. L'attatga dals Verds cun
lur candidat *Gerhard Andrey* n'ha betg gì schanzas.

Paginas 2, 3 e 5



FOTO KEYSTONE/PETER SCHNEIDER

«Jau sun sa chapescha persunalmain in pau dischillus.
Jau hai investì bler, jau hai cumbattì fin la fin.
E lura vuless ins gugent era surpigliar l'uffizi.»

Quai di Jon Pult davart sia terrada per in post en il Cussegl federal. – Pagina 2



Servetsch d'abunents e da
distribuziun: tel. 0844 226 226
mail: abo@somedia.ch